

鼓山志卷一



郡守李拔鑒定

郡人黃任脩輯

張伯謨叅訂

名勝

山海名經昉自伯益三代以後迄於齊梁志地者二百四十餘家獨漢桑欽水經支分條析依倣經體後魏酈道元注之博採異聞粲乎稱大備矣閩地山水奧區顧以荒服獨遺紀載而鼓山距城伊邇直至唐永始闢洪荒其中白雲鳳池諸勝至明季以後發其靈秀奇瑋則名山顯晦亦有其時屐齒之所未及仍莫得而名之志名勝

鼓山志

卷一

鼓山距郡城東三十里屹立海濱高可十五里延袤數十里郡之鎮山也名勝志云山巔有巨石如鼓或云每風雨大作其中簌蕩有聲故名郭璞遷城記云右旗左鼓全閩二絕山有雲氣則天必雨也劣巔峰一名大頂山最高處狀若覆釜其頂常爲雲氣所籠必天氣清朗始可登眺南望雙江如帶環

遶隔江諸山如象奔虎踞皆止於江干西望郡城
若圖畫遠近村落若聚米若布棋北望萬山爭奇
競峭若擁而立其後東望大海一氣茫然螺髻數
點隱見煙波中相傳謂大小琉球云其旁有神泉
噴石壁中可以愈疾萬歷初赴者雲集居民至開
邸舍其下久之乃息大旱禱雨官常請水於此

白雲峰一名小頂在大頂峰下當寺之背西南望與
大頂等平地有竇泉湧出下有忘歸巖

靈源洞亦有忘歸石

縋貓石

狀如鐵貓

鼓山志

卷一

二

鳳池山在大頂峰北三面皆山南闢爲門中平行可
百餘畝池廣十畝不納他流而大旱弗涸

詳古蹟下

爲鳳池東鄉鳳池西鄉有石鼓巖徑一丈二面圓
如鼓有雙髻石兩石對結如髻又有石如掌刻觀
音掌三字有石如塔名塔石

靈源洞在寺之左爲大頂左支巖竇歎怪下石磴六
十餘級中忽開朗兩傍皆石壁中裂一澗深可三
丈有似於洞故名跨以石橋橋下無水有喝水巖
在西澗端

詳古蹟

國師巖在西澗底有石龕深廣約

十尺

詳古蹟

忘歸石在洞東壁將軍石在洞側峙立

狀若甲士仙蹟石在將軍石下有指痕四鷄頭石

在洞壁中一峰獨聳旁垂如俛啄狀緣巖小徑迤

遞而東有龍頭泉泉噴石壁中相傳卽西澗逆流

而出於此勢甚雄猛引以石龍注于石池池水弗

溢伏流而下出於前澗又東有白猿峽

詳古蹟

峽之

左有石門二石嵯岬對峙如門度石門有臨滄舊

址又東爲水雲亭

詳見橋亭

鼓山志

卷一

三

山逕險窄怪石棋布上有達磨洞洞中有泉甘寒

可飲後有古亭址望州城最邇疑卽古望州亭

詳古蹟

旁有石竈

詳古蹟

鉢盂峰在獅子峰之東頂微凹若覆盂故名下有石

卓立如圭刊高山仰止四字有石方廣三丈名羅

漢臺前卽古松關

香爐峰在鉢盂峰之東爲寺前案前卽觀化亭三塔

在焉

舍利窟一名茶園訛爲笊籬窟在香爐峰之前自山

腰分徑而入別爲一區倚巖架屋居人二十餘家相傳閩王創寺時人有罪謫居於此使之種茶以供香積後子孫僅存一二逃散他方常住爲贖其地

東峰在鉢盂峰前上山路經其旁

卓錫峰在東峰左奇秀卓立前拱海會塔

乘雲嶺在東峰下上山大路由東際橋至嶺一里許有山泉瀰漫石面又半里有泉曰靈泉又一里有二石合立如珪曰合珪石

鼓山志

卷一

四

鼓碕崗在卓錫峯前下臨鼓碕江有石如鼓

簫灣嶺在鼓碕崗左有巖形若懸鐘

蓬碕嶺在簫灣嶺左山石重疊有蛇洞空濛屈曲莫知所止有石如劍名劍石

獅眠崗在山南麓解院之左普度寺在其下有小溪環其前

半月崗在獅眠崗右古讖云半月山下出繡女

牛眠崗在廨院右全體皆石鑿數百級而登兩傍皆古樹根盤石隙上有黃石公廟前有溪名子房溪

橋名圮橋

天鏡巖在般若洋前巖中有洞深八丈廣二丈上通一竅其圓如鏡天光下矚故名崇禎戊辰僧智諦始闢剏樓倚洞以居今廢

海音洞在鳳池右歷數峰始達洞口可坐四席其中深不可側相傳有羽流居此時聞海濤之音以爲通於海云前有佛頭巖

白雲洞在海音洞下嶮巖峻峭巨石棋布萬歷丙戌僧悟宗始闢名勝志云自黃坑而登磴級斬然如

鼓山志

卷一

五

升梯峭壁懸崖兩石對峙如門者三下二門稍寬最上爲一天門僅容側肩自此又歷石磴七百二十級至一坪又百武始至洞奇巖劃開深丈許廣逾五丈倚巖爲屋石天爲蓋白雲混入咫尺莫辨當霽時郡城煙火邇若眉睫洞旁有泉味最清冽溜水懸注名吼雷湫有潭名印月潭前有雲屏巖叫佛嶺在一天門下龍脊道在二天門下金剛石在印月潭上

桃巖洞在山西南麓深丈許廣二丈以幽寂勝洞前

有田圃可耕種

論曰郡中名山秀甲天下而鼓岫稱雄者以形象
言爲全閩左輔且興雲降雨流潤疆域非徒巖洞
幽邃供人遊覽而已若夫靈源之奇秀鳳池之超
異白雲三天門之怪險杖屨所及自得於雲嵐縹
渺之外無待鋪張揚厲而後著也

鼓山志卷一終

鼓山志

卷一

六